



AN COIMISIÚN
EORPACH

An Bhruiséil, 27.3.2014
COM(2014) 187 final

ANNEXES 1 to 11

IARSCRÍBHINNÍ

a ghabhann leis an

Togra le haghaidh

RIALACHÁIN Ó PHARLAIMINT NA hEORPA AGUS ÓN gCOMHAIRLE

maidir le suiteálacha cábla-bhealaigh

{ SWD(2014) 116 final }

{ SWD(2014) 117 final }

IARSCRÍBHINN I

FOCHÓRAIS

Roinntear suiteáil cábla-bhealaigh i mbonneagar agus na fochórais atá liostaithe thíos, agus ní mór cumas saothraithe agus cothabhála na suiteála a chur san áireamh i ngach cás:

1. Cáblaí agus naisc cábla.
2. Tiomántáin agus coscáin.
3. Trealamh meicniúil:
 - 3.1. Giar tochráin cábla.
 - 3.2. Innealra stáisiúin.
 - 3.3. Innealtóireacht líne.
4. Feithiclí:
 - 4.1. Cábáin, suíocháin nó feistí cúltarraingthe.
 - 4.2. Giar crochta.
 - 4.3. Giar tiomána.
 - 4.4. Naisc leis an gcábla.
5. Feistí leictreicniúla:
 - 5.1. Feistí faireacháin, rialaithe agus sábháilteachta.
 - 5.2. Trealamh cumarsáide agus faisnéise.
 - 5.3. Trealamh cosanta ó thintreach.
6. Trealamh tarrthála:
 - 6.1. Trealamh tarrthála fosaithe.
 - 6.2. Trealamh tarrthála soghluaiste.

IARSCRÍBHINN II

CEANGLAIS RIACHTANACHA

1. Aidhm

Leagtar amach san Iarscríbhinn seo na ceanglais riachtanacha, lena n-áirítear cumas cothabhála agus inoibritheacht, is infheidhme maidir le dearadh, tógáil agus cur i seirbhís suiteálacha cábla-bhealaigh.

2. Ceanglais ghinearálta

2.1. Sábháilteacht daoine

Tá sábháilteacht úsáideoirí, oibreoirí agus tríú páirtithe mar bhuncheanglas maidir le dearadh, tógáil agus oibriú suiteálacha cábla-bhealaigh.

2.2. Prionsabal na sábháilteachta

Déanfar gach suiteáil cábla-bhealaigh a dhearadh, a oibriú agus a sheirbhísiú de réir na bprionsabal seo a leanas, a chuirfear i bhfeidhm san ord atá tugtha:

- rioscaí a dhíchur nó, mura féidir é sin a dhéanamh, rioscaí a laghdú trí ghnéithe deartha agus tógála,

- gach beart is gá a shainiú agus a chur chun feidhme chun cosaint a thabhairt i gcoinne rioscaí nach féidir a dhíchur leis na gnéithe deartha agus tógála,
- na réamhchúraimí ba cheart a ghlacadh chun na rioscaí a sheachaint a shainiú agus a lua nuair nach raibh sé indéanta iad a dhíchur go hiomlán trí na forálacha agus na bearta dá dtagraítear sa chéad agus sa dara fleasc.

2.3. *Breithniú tosca seachtracha*

Ní mór suiteálacha cábla-bhealaigh a dhearadh agus a thógáil ar bhealach a fhágfaidh go mbeifear in ann iad a oibriú go sábháilte, ag cur san áireamh an cineál suiteála cábla-bhealaigh, cineál agus gnéithe fisiciúla an tír-raoin ar a bhfuil sé suiteáilte, a timpeallacht, agus tosca atmaisféir agus meitéareolaíochta, chomh maith le struchtúir agus bacainní a d'fhéadfadh a bheith gar dóibh ar an talamh nó san aer.

2.4. *Toisí*

Déanfar an tsuiteáil chábla-bhealaigh, na fochórais agus a cuid comhpháirteanna sábháilteachta go léir a thoisiú, a dhearadh agus a thógáil le bheith in ann gach brú a thagann orthu faoi gach dáil intuatha a sheasamh, chomh sábháilte agus is féidir, lena n-áirítear brúnna a tharlaíonn nuair nach mbíonn siad ag obair, agus tionchair sheachtracha go háirithe, éifeachtaí dinimiciúla agus feiniméin tuirse á gcur san áireamh, agus rialacha aitheanta na ceirde á gcomhlíonadh, ag tabhairt aird go háirithe ar an rogha ábhar.

2.5. *Cóimeáil*

2.5.1. Déanfar an tsuiteáil chábla-bhealaigh, a fochórais agus na comhpháirteanna sábháilteachta go léir a dhearadh agus a thógáil ar bhealach a áiríteoidh gur féidir iad a chóimeáil agus a chur ag obair go sábháilte.

2.5.2. Déanfar na comhpháirteanna sábháilteachta a dhearadh ionas nach mbeifear in ann botúin a dhéanamh leis an gcóimeáil, mar thoradh ar thógáil nó trí mharcálacha iomchuí ar na comhpháirteanna iad féin.

2.6. *Sláine na suiteála cábla-bhealaigh*

2.6.1. Déanfar na comhpháirteanna sábháilteachta a dhearadh agus a thógáil agus beidh siad inúsáidte ar bhealach a áiríteoidh, i ngach cás, a sláine oibríochta féin agus/nó sábháilteacht na suiteála cábla-bhealaigh, mar atá sainmhínithe san anailís sábháilteachta in Iarscríbhinn III, ionas gur beag baol atá ann go dteipfidh orthu agus go mbeidh corrlach sábháilteachta leormhaith ag gabháil leo.

2.6.2. Déanfar an tsuiteáil chábla-bhealaigh a dhearadh agus a thógáil ar bhealach a áiríteoidh, lena linn a hoibriú, i gcás go dteipfidh ar chomhpháirt a bhféadfadh tionchar a bheith aici ar shábháilteacht, fiú amháin go hindíreach, go nglacfar beart iomchuí in am cuí.

2.6.3. Beidh feidhm ag na cosaintí dá dtagraítear i bpointe 2.6.1 agus i bpointe 2.6.2 ar feadh na tréimhse idir dhá iniúchadh sceidealaithe ar an gcomhpháirt lena mbaineann. Tabharfar an tréimhse ama d'iniúchadh sceidealaithe na gcomhpháirteanna sábháilteachta le fios go soiléir i lámhleabhar na dtreoracha.

2.6.4. Comhlíonfaidh comhpháirteanna sábháilteachta atá corpraithe i suiteálacha cábla-bhealaigh mar pháirteanna spártha ceanglais riachtanacha an Rialacháin seo agus na coinníollacha a bhaineann le hidirghníomhú réidh na gcomhpháirteanna sin leis na páirteanna eile de na suiteálacha cábla-bhealaigh.

2.6.5. Glacfar bearta lena áirithiú nach gcuirfidh éifeachtaí dóiteáin sa tsuiteáil chábla-bhealaigh sábháilteacht na ndaoine atá á n-iompar ná oibrithe i gcontúirt.

2.6.6. Glacfar bearta speisialta chun suiteálacha cábla-bhealaigh agus daoine a chosaint ó éifeachtaí tintrí.

2.7. Feistí sábháilteachta

2.7.1. Déanfar aon fhabht sa tsuiteáil chábbla-bhealaigh a d'fhágfadh go bhféadfadh teipeadh air agus sábháilteacht a chur i mbaol, a aimsiú, a thuairisciú agus a phróiseáil, nuair is féidir, trí fheiste sábháilteachta. Baineann an rud céanna le haon teagmhas seachtrach a bheadh intuartha de ghnáth agus a d'fhéadfadh an tsábháilteacht a chur i mbaol.

2.7.2. Beifear in ann an tsuiteáil chábbla-bhealaigh a mhúchadh de láimh ag aon tráth.

2.7.3. Tar éis an tsuiteáil chábbla-bhealaigh a mhúchadh trí fheiste sábháilteachta, ní bheifear in ann é a atosú mura nglacfar beart iomchuí.

2.8. Cumas cothabhála

Déanfar an tsuiteáil chábbla-bhealaigh a dhearadh agus a thógáil ionas go mbeifear in ann gnáth-chothabháil nó cothabháil speisialta agus oibríochtaí agus nósanna imeachta deisiúcháin a dhéanamh go sábháilte air.

2.9. Núis

Déanfar an tsuiteáil chábbla-bhealaigh a dhearadh agus a thógáil ar bhealach a áiríteoidh go mbeidh aon núis inmheánach nó sheachtrach a tharlóidh mar gheall ar gháis dhíobhálacha, astaíochtaí torainn nó creathanna laistigh de na teorainneacha atá leagtha síos.

3. Ceanglais maidir le bonneagar

3.1. Leagan amach, luas, achar idir feithiclí

3.1.1. Dearfar an tsuiteáil chábbla-bhealaigh chun oibriú go sábháilte ag cur san áireamh saintréithe an tír-raoin agus a timpeallacht, na dálaí atmaisféir agus meitéareolaíocha, aon struchtúir nó bacainní a d'fhéadfadh a bheith gar dóibh ar an talamh nó san aer ar bhealach a chiallóidh nach dtarlóidh aon núis ná aon chontúirt faoi aon dhálaí oibríochta nó seirbhísithe ná i gcás oibríochta chun daoine a tharrtháil.

3.1.2. Coinneofar dóthain achair go cliathánach agus go hingearach idir feithiclí, fearais tarraingthe, rianta, cáblaí, etc. agus struchtúir agus bacainní a d'fhéadfadh a bheith gar dóibh ar an talamh nó san aer, ag cur san áireamh gluaiseacht ingearach, chomhréireach agus chliathánach na gcáblaí agus na bhfeithiclí nó na bhfearas tarraingthe faoi na dálaí oibríochta intuartha is díobhálaí.

3.1.3. Cuirfidh an t-achar uasta idir feithiclí agus an talamh, an cineál suiteála cábla-bhealaigh, na cineálacha feithiclí agus na nósanna imeachta tarrthála san áireamh. I gcás carranna oscailte cuirfear san áireamh freisin an riosca go dtitfidh duine chomh maith leis na gnéithe síceolaíocha a bhaineann leis an achar idir feithiclí agus an talamh.

3.1.4. Déanfar luas uasta na bhfeithiclí nó na bhfearas tarraingthe, an t-achar íosta eatarthu agus a bhfeidhmiú luasghéaraithe agus coscánaithe a roghnú d'fhonn sábháilteacht daoine agus oibriú sábháilte na suiteála cábla-bhealaigh a áirithiú.

3.2. Stáisiúin agus struchtúir feadh na líne

3.2.1. Déanfar stáisiúin agus struchtúir feadh na líne a dhearadh, a shuiteáil agus a fheistiú d'fhonn cobhsaíocht na suiteála a áirithiú. Ceadófar leo teorú sábháilte na gcáblaí, na bhfeithiclí agus na bhfearas tarraingthe, agus beifear in ann cothabháil a dhéanamh go sábháilte, faoi gach dáil oibriúcháin.

3.2.2. Déanfar na limistéir isteach agus amach as an tsuiteáil chábla-bhealaigh a dhearadh d'fhonn sábháilteacht thrácht na bhfeithiclí, na bhfearas tarraingthe agus daoine a ráthú. Beifear in ann na feithiclí agus na fearais tarraingthe a bhogadh thart sna stáisiúin gan daoine a chur i mbaol, ag cur san áireamh aon chomhoibriú a d'fhéadfaidís a thabhairt chun iad a bhogadh.

4. Ceanglais a bhaineann le cáblaí, tiomántáin agus coscáin agus le suiteálacha meicniúla agus leictreacha

4.1. Cáblaí agus a gcuid tacaíochtaí

4.1.1. Déanfar gach beart a ghlacadh ar aon dul leis na forbairtí teicneolaíocha is déanaí:

- ionas nach mbrisfidh cáblaí ná a gcuid ceangaltán,
- chun a luachanna struis íosta agus uasta a chumhdach,
- lena áirithiú go gcrochtar go sábháilte iad ar a dtacaíochtaí agus nach ndéantar díráilliú orthu,
- ionas gur féidir faireachán a dhéanamh orthu.

4.1.2. Ní féidir an baol go léir a bhaineann le díráilliú cáblaí a chosc, glacfar bearta lena áirithiú gur féidir cáblaí a aisghabháil agus na suiteálacha cábla-bhealaigh a mhúchadh gan daoine a chur i mbaol i gcás díráillithe.

4.2. Suiteálacha meicniúla

4.2.1. Tiomántáin

Beidh an córas tiomántáin i suiteáil chábla-bhealaigh in ann oibriú agus feidhmiú mar is ceart, agus cuirfear in oiriúint é do na córais agus modhanna oibríochta éagsúla.

4.2.2. Tiomántán cúltaca

Beidh tiomántán cúltaca sa tsuiteáil chábla-bhealaigh ina mbeidh soláthar fuinnimh atá neamhspleách uaidh sin atá sa phríomhchóras tiomántáin. Ní bheidh tiomántán cúltaca riachtanach, áfach, má thaispeántar san anailís sábháilteachta gur féidir le daoine na feithiclí agus, go háirithe, fearais tarraingthe a fhágáil go héasca, go tapa agus go sábháilte fiú amháin nuair nach mbíonn tiomántán cúltaca ar fáil.

4.2.3. Coscánú

4.2.3.1. I gcás éigeandála, beifear in ann an tsuiteáil chábla-bhealaigh agus/nó na feithiclí a mhúchadh ag aon tráth, faoi na dálaí is neamhfhabhraí i dtéarmaí ualaigh údaraithe agus greamú ulóige le linn oibríochta. Beidh an t-achar stoptha chomh gearr agus a bheidh de dhíth ar mhaithe le slándáil na suiteála cábla-bhealaigh.

4.2.3.2. Beidh luachanna luasmhoillithe laistigh de theorainneacha leordhóthanacha, socraithe ar shlí a áiritheoidh sábháilteacht daoine agus iompar sásúil feithiclí, cáblaí agus páirteanna eile den tsuiteáil chábla-bhealaigh.

4.2.3.3. I ngach suiteáil chábla-bhealaigh beidh dhá chóras coscánaithe nó níos mó, agus gach ceann acu in ann an tsuiteáil chábla-bhealaigh a stopadh, agus beidh siad comhordaithe ar shlí a chiallóidh go ndéanfaidh siad ionadú go huathoibríoch ar an gcóras gníomhach nuair nach leor a éifeachtúlacht. Gníomhóidh córas coscánaithe deiridh an chábla tarraingthe go díreach ar an ulóg thiomána. Ní bheidh feidhm ag na forálacha sin i gcás arduithe trína dtarraingt.

4.2.3.4. Feisteofar an tsuiteáil chábla-bhealaigh le clampa éifeachtach agus le fearas glasála chun cosaint a thabhairt in aghaidh atosuithe róluath.

4.3. Feistí rialaithe

Déanfar na feistí rialaithe a dhearadh agus a thógáil ionas go mbeidh siad sábháilte agus iontaofa, in ann ag gnáth-bhrúnna oibriúcháin agus cúinsí seachtracha cosúil le taisce, teocht an-mhór nó trasnaíocht leictreamaighnéadach agus ionas nach mbeidh cásanna contúirteacha ann, fiú amháin i gcás earráid oibríochta.

4.4. Feistí cumarsáide

Cuirfear áiseanna oiriúnacha ar fáil chun cur ar chumas na foirne oibríochta cumarsáid a dhéanamh lena chéile ag gach tráth agus úsáideoirí a chur ar an eolas i gcás éigeandála.

5. Feithiclí agus fearais tarraingthe

5.1. Déanfar feithiclí agus/nó fearais tarraingthe a dhearadh agus a fheistiú ar bhealach a chiallóidh faoi dhálaí oibriúcháin intuatha nach féidir le haon duine titim amach agus nach mbeidh siad in aon chontúirt eile.

5.2. Déanfar feistiú feithiclí agus fearais tarraingthe a thoisiú agus a thógáil ionas:

- nach ndéanfar díobháil don chábla, nó
- nach sciorrfaidh sé, ach amháin nuair nach mbíonn aon tionchar suntasach ag sciorradh ar shábháilteacht na feithicle, an fhearais tarraingthe nó na suiteála

faoi na dálaí is neamhfhabhraí.

5.3. Déanfar doirse feithiclí (ar charranna, cábáin) a dhearadh agus a thógáil ar bhealach a fhágfaidh go mbeifear in ann iad a dhúnadh agus a chur faoi ghlas. Déanfar urlár agus ballaí na feithicle a dhearadh agus a thógáil ionas go mbeidh siad in ann brú agus ualaí a chuirfidh úsáideoirí orthu a sheasamh in aon chúinse ar bith.

5.4. Más rud é ar chúiseanna sábháilteachta oibríochta gur gá d'oibreoir a bheith ar bord na feithicle, feisteofar an fheithicil leis an trealamh is gá dó chun a chúraimí a chur i gcrích.

5.5. Déanfar feithiclí agus/nó fearais tarraingthe agus, go háirithe, a gcuid meicníochtaí crochta a dhearadh agus a fheistiú d'fhonn sábháilteacht oibríthe a bhíonn á seirbhísiú a áirithiú de réir rialacha agus teoracha iomchuí.

5.6. I gcás feithiclí a bhfuil feistí orthu is féidir a dhínascadh, glacfar gach beart, gan úsáideoirí a chur i mbaol, tráth imeachta na bhfeithiclí, chun aon fheithicil a bhfuil a feiste nasctha go contráilte leis an gcábla a stopadh agus, tráth bainte amach an ceann scríbe, stopfar aon fheithicil nár dhínascadh a feiste, ionas nach dtitfidh an fheithicil.

5.7. Beidh feithiclí cáblacha agus, chomh fada is a cheadaíonn cumrú na suiteála cábla-bhealaigh, beidh feiste teannta coscáin uathoibríoch ar ráille carranna cábla dé-chábla, nuair nach féidir talamh slán a dhéanamh de nach mbrisfidh an cábla iompróra.

5.8. Nuair nach féidir an baol go léir a bhaineann le díráilliú na feithicle a dhíchur le bearta eile, feisteofar an fheithicil le feiste frithdhírailithe a fhágfaidh go mbeifear in ann an fheithicil a stopadh gan daoine a chur i mbaol.

6. Trealamh d'úsáideoirí

Déanfar an rochtain ar limistéir bhordála agus amach as limistéir díbhordála agus bordáil agus díbhordáil úsáideoirí a eagrú ag féachaint do ghluaiseacht agus do stopadh feithiclí ar bhealach a áiríteoidh sábháilteacht daoine, go háirithe i limistéir ina bhfuil baol ann go dtitfidh daoine.

Ní mór go mbeadh leanaí agus daoine a bhfuil a soghluaisteacht laghdaithe in ann an tsuiteáil chábla-bhealaigh a úsáid go sábháilte má tá an tsuiteáil chábla-bhealaigh deartha chun daoine mar sin a iompar.

7. Inoibritheacht

7.1. Sábháilteacht

7.1.1. Glacfar gach foráil agus beart teicniúil lena áirithiú go n-úsáidtear an tsuiteáil chábla-bhealaigh le haghaidh na críche dár ceapadh í de réir a sonraíochta teicniúil agus na gcoinníollacha oibríochta atá sonraithe agus gur féidir na treoracha maidir le hoibriú agus cothabháil shábháilte a chomhlíonadh. Déanfar an lámhleabhar treoracha agus na nótaí comhfhreagracha a dhréachtú i dteanga a bheidh úsáideoirí in ann a thuiscint go héasca, arna chinneadh ag an mBallstát sa chríoch ina bhfuil an tsuiteáil chábla-bhealaigh tógtha.

7.1.2. Tabharfar na hacmhainní ábhartha iomchuí do na daoine a bheidh freagrach as an tsuiteáil chábla-bhealaigh a oibriú agus beidh siad cáilithe chun an cúram sin a chur i gcrích.

7.2. Sábháilteacht i gcás bac gluaiseachta ar an tsuiteáil chábla-bhealaigh

Glacfar gach foráil agus beart teicniúil lena áirithiú go mbeifear in ann úsáideoirí a thabhairt chuig áit shábháilte taobh istigh d'am socraithe a bheidh oiriúnach don chineál suiteála cábla-bhealaigh agus a timpeallacht nuair a bhíonn bac gluaiseachta ar an tsuiteáil chábla-bhealaigh agus nach féidir é a atosú go tapa.

7.3. Forálacha speisialta eile maidir le sábháilteacht

7.3.1. Seastáin agus áiteanna oibre oibreoirí

Déanfar páirteanna sochorraithe a bhíonn inrochtana de ghnáth sna stáisiúin a dhearadh, a thógáil agus a shuiteáil ar bhealach a chuirfidh cosc ar aon rioscaí nó, i gcás ina bhfuil rioscaí den sórt sin ann, feisteofar iad le feistí cosanta ionas nach mbeidh aon teagmháil le páirteanna den tsuiteáil chábla-bhealaigh a d'fhéadfadh a bheith ina gcúis le timpistí. Is cineál feistí a bheidh iontu seo nach féidir a bhaint ná a chur ó mhaith go héasca.

7.3.2. Baol titime

Déanfar áiteanna oibre agus limistéir oibre, lena n-áirítear iad sin nach n-úsáidtear ach go hannamh, agus an rochtain orthu, a dhearadh agus a thógáil ar bhealach a choisfidh daoine a chaithfidh oibriú iontu nó bogadh thart iontu ó thitim. I gcás nach mbeidh an tógáil sách maith, tabharfar pointí ancaireachta dóibh freisin chun trealamh cosanta pearsanta a chaitheamh chun titim a chosc.

IARSCRÍBHINN III

ANAILÍS SÁBHÁILTEACHTA

San anailís sábháilteachta atá riachtanach de réir Airteagal 8 maidir le gach suiteáil chábla-bhealaigh cuirfear san áireamh gach modh oibríochta a shamhlaítear. Leanfar modh aitheanta nó bunaithe san anailís agus cuirfear san áireamh staid reatha na teicníochta agus a chasta atá an tsuiteáil chábla-bhealaigh atá i gceist. Is é an aidhm freisin a áirithiú gur chóir i ndearadh agus i gcumraíocht na suiteála cábla-bhealaigh an timpeallacht áitiúil agus na staideanna is díobhálaí a chur san áireamh d'fhonn dálaí sábháilteachta sásúla a áirithiú.

Cumhdófar san anailís sábháilteachta freisin na feistí sábháilteachta agus a dtionchar ar an tsuiteáil chábla-bhealaigh agus ar fhochórais ghaolmhara a chuirtear ag obair leo ionas:

- go mbeidh siad in ann freagra a thabhairt ar chliseadh tosaigh nó ar theipeadh a aimsítear ionas go bhfanfaidh siad i staid lena ráthaítear sábháilteacht, i modh oibríochta níos ísle nó i staid lena gcuirtear cosc ar theipeadh,

- go mbeidh siad díomhaoín agus go ndéanfar faireachán orthu, nó
- go mbeidh siad ar dhóigh go mbeifear in ann an dóchúlacht maidir lena dteipeadh a mheas agus go mbeidh siad ar chaighdeán comhionann leis sin arna bhaint amach ag feistí sábháilteachta a chomhlíonann na critéir sa chéad agus sa dara fleasc.

Ní mór anailís sábháilteachta a úsáid chun an fardal rioscaí agus cásanna contúirteacha a dhréachtú i gcomhréir le hAirteagal 8(1) agus chun liosta na gcomhpháirteanna sábháilteachta dá dtagraítear in Airteagal 8(2) iontu a chinneadh. Déanfar achoimre i dtuarascáil sábháilteachta ar thoradh na hanailíse sábháilteachta

IARSCRÍBHINN IV

NÓSANNA IMEACHTA UM MEASÚNÚ COMHRÉIREACHTA D'FHOCHÓRAIS AGUS DO CHOMHPHÁIRTEANNA SÁBHÁILTEACHTA: MODÚL B: SCRÚDÚ CINEÁIL AN AE – CINEÁL TÁIRGTHE

1. Is cuid de nós imeachta um measúnú comhréireachta é scrúdú cineáil an AE ina ndéanann comhlacht dá dtugtar fógra scrúdú ar dheardh teicniúil fochórais nó comhpháirt sábháilteachta agus ina ndeimhníonn sé agus ina ndearbhaíonn sé go gcomhlíonann sé ceanglais an Rialacháin seo.

2. Déantar scrúdú cineáil an AE trí mheasúnú a dhéanamh ar leordhóthanacht dheardh teicniúil an fhochórais nó na comhpháirte sábháilteachta tríd iniúchadh ar an doiciméadacht theicniúil agus an fhianaise tacaíochta dá dtagraítear i bpointe 3, chomh maith le hiniúchadh ar shampla atá ionadaíoch don táirgeadh atá beartaithe, ar an bhfochóras iomlán nó ar an gcomhpháirt sábháilteachta (cineál táirgthe).

3. Cuirfidh an monaróir iarratas isteach ar iniúchadh cineáil an AE chuig comhlacht amháin dá dtugtar fógra a roghnóidh sé féin.

Beidh na nithe seo a leanas go léir san iarratas:

- ainm agus seoladh an mhonaróra agus, más é an t-ionadaí údaraithe a chuireann an t-iarratas isteach, a ainm agus a sheoladh freisin,
- dearbhuí i scríbhinn nár cuireadh an t-iarratas céanna isteach chuig aon chomhlacht eile dá dtugtar fógra,
- an doiciméadacht theicniúil don fhochóras agus/nó don chomhpháirt sábháilteachta i gcomhréir le hIarscríbhinn IX.
- sampla ionadaíoch den fhochóras nó den chomhpháirt sábháilteachta atá beartaithe nó sonraí maidir leis an áitreabh inar féidir é a scrúdú. Féadfaidh an comhlacht dá dtugtar fógra samplaí breise a iarraidh más gá sin chun an clár tástála a chur i gcrích;

4. Déanfaidh an comhlacht dá dtugtar fógra an méid seo a leanas:

4.1. an doiciméadacht theicniúil agus an fhianaise tacaíochta a scrúdú chun fóntacht dheardh teicniúil an fhochórais nó na comhpháirte sábháilteachta a mheasúnú;

4.2. a fhíorú gur monaraíodh an sampla/na samplaí i gcomhréir leis an doiciméadacht theicniúil, agus na gnéithe a aithint a dearadh i gcomhréir leis na forálacha is infheidhme ar na caighdeáin chomhchuibhithe ábhartha agus na sonraíochtaí teicniúla, mar aon leis na heilimintí a dearadh gan forálacha ábhartha na gcaighdeán sin a chur i bhfeidhm;

4.3. i gcás inar chuir an monaróir sonraíochtaí na gcaighdeán comhchuibhithe ábhartha i bhfeidhm, na scrúduithe agus na tástálacha iomchuí a dhéanamh, nó socrú lena ndéanamh, d'fhonn seiceáil cibé ar cuireadh i bhfeidhm i gceart iad;

4.4 scrúduithe agus tástálacha iomchuí a dhéanamh, nó socrú lena ndéanamh, lena sheiceáil cibé, i gcásanna inar roghnaigh an monaróir na réitigh sna caighdeáin chomhchuibhithe ábhartha agus/nó na sonraíochtaí teicniúla a chur i bhfeidhm, ar cuireadh i bhfeidhm i gceart iad;

4.5. scrúduithe agus tástálacha iomchuí a dhéanamh, nó socrú lena ndéanamh, lena sheiceáil cibé ar chomhlíon na réitigh a ghlac an monaróir buncheanglais chomhfhreagracha an Rialacháin seo sa chás nár cuireadh na réitigh sna caighdeáin chomhchuibhithe ábhartha agus/nó na sonraíochtaí teicniúla i bhfeidhm;

4.6. a aontú leis an monaróir cén suíomh ar a ndéanfar na scrúduithe agus tástálacha.

5. Ullmhóidh an comhlacht dá dtugtar fógra tuarascáil mheasúnaithe ina gcláraítear na gníomhaíochtaí a rinneadh i gcomhréir le pointe 1.4 agus a dtorthaí. Gan dochar dá oibleagáidí i leith na n-údarás a thugann fógra, ní scaoilfidh an comhlacht dá dtugtar fógra ábhar na tuarascála sin, go hiomlán nó go páirteach, ach amháin le comhaontú an mhonaróra.

6. I gcás ina gcomhlíonann an cineál ceanglais an Rialacháin seo, eiseoidh an comhlacht dá dtugtar fógra deimhniú ar scrúdú cineáil an AE chuig an monaróir. Beidh sa deimhniú ainm agus seoladh an mhonaróra, conclúidí an scrúdaithe, aon choinníollacha maidir lena bhailíocht, na sonraí is gá chun an cineál formheasta a aithint (fochóras nó comhpháirt sábháilteachta) agus más ábhartha, cur síos ar a fheidhmiú. Féadfaidh iarscríbhinn amháin nó níos mó a bheith ceangailte leis an deimhniú.

Beidh sa deimhniú agus ina iarscríbhinní gach faisnéis ábhartha ar a bhféadfar comhréireacht na bhfochóras monaraithe agus na gcomhpháirteanna sábháilteachta leis an gcineál a scrúdaíodh a mheas agus chun gur féidir rialú inseirbhíse a dhéanamh.

Beidh uastréimhse bailíochta deich mbliana fichead ó dháta a eisiúna ag an deimhniú. I gcás nach gcomhlíonann an cineál ceanglais infheidhme an Rialacháin seo, diúltóidh an comhlacht dá dtugtar fógra teastas scrúdaithe de chineáil AE a eisiúint agus cuirfidh sé é sin in iúl don iarratasóir, agus tabharfaidh sé cúiseanna mionsonraithe lena dhiúltú.

7. Coinneoidh an comhlacht dá dtugtar fógra é féin ar an eolas faoi aon athruithe ar staid na teicníochta lena nglactar go ginearálta a léiríonn go bhféadfadh sé nach gcomhlíonann an cineál formheasta a thuilleadh ceanglais infheidhme an Rialacháin seo, agus cinnfidh sí cibé an gá imscrúdú breise a dhéanamh de bharr athruithe den sórt sin. Más amhlaidh atá, cuirfidh an comhlacht dá dtugtar fógra an monaróir ar an eolas dá réir sin.

Cuirfidh an monaróir an comhlacht dá dtugtar fógra agus a bhfuil an doiciméadacht theicniúil a bhaineann leis an deimhniú ar scrúdú cineáil an AE aige ar an eolas faoi aon mhodhnuithe ar an gcineál formheasta a d'fhéadfadh difear a dhéanamh do chomhréireacht an fhochórais nó na comhpháirte sábháilteachta le buncheanglais an Rialacháin seo nó le coinníollacha bailíochta an deimhnithe.

Déanfaidh an comhlacht dá dtugtar fógra imscrúdú ar an modhnú agus cuirfidh sé in iúl don mhonaróir cibé an bhfuil an deimhniú ar scrúdú cineáil an AE fós bailí nó cibé an bhfuil gá le tuilleadh scrúduithe, fíoruithe nó tástálacha. Mar is iomchuí, eiseoidh an comhlacht dá dtugtar fógra ábhar breise leis an deimhniú ar scrúdú cineáil an AE nó iarrfaidh sé go gcuirfear iarratas nua ar scrúdú cineáil an AE isteach.

8. Gach comhlacht dá dtugtar fógra, cuirfidh sé a údaráis a thugann fógra agus na comhlachtaí eile dá dtugtar fógra ar an eolas faoi na deimhnithe ar scrúdú cineáil an AE agus/nó aon chinn bhreise d'eisigh sé.

An comhlacht dá dtugtar fógra a dhiúltóidh deimhniú ar scrúdú cineáil an AE a eisiúint nó a tharraingt siar, nó a chuireann ar fionraí nó a shrianann ar shlí eile é, ní mór dó é sin a chur in

iúl do na húdarais a thugann fógra agus do na comhlachtaí eile dá dtugtar fógra dá réir, agus tabharfaidh sé cúiseanna lena chinneadh.

Féadfaidh an Coimisiún, na Ballstáit agus na comhlachtaí eile dá dtugtar fógra cóip a fháil, ar iarratas, de na deimhnithe ar scrúdú cineáil an AE agus/nó na cinn bhreise a ghabhann leo. Arna iarraidh sin, féadfaidh an Coimisiún agus na Ballstáit cóip den doiciméadacht theicniúil agus de thorthaí na scrúduithe a rinne an comhlacht dá dtugtar fógra a fháil. An comhlacht dá dtugtar fógra, coinneoidh sé cóip den deimhniú ar scrúdú cineáil an AE, dá iarscríbhinní agus ábhair bhreise, chomh maith leis an gcomhad teicniúil lena n-áirítear na doiciméid a chuir an monaróir isteach, go dtí go dtéann bailíocht an deimhnithe as feidhm.

9. Coinneoidh an monaróir cóip den deimhniú ar scrúdú cineáil an AE, dá iarscríbhinní agus ábhair bhreise mar aon leis an doiciméadacht theicniúil agus beidh siad ar fáil do na húdarais náisiúnta ar feadh 30 bliain tar éis an fochórais nó an chomhpháirt sábháilteachta a chur ar an margadh.

10. Féadfaidh a ionadaí údaráithe oibleagáidí an mhonaróra atá leagtha amach i bpointe 7 agus 9 a chomhlíonadh, ar choinníoll go sonraítear sa sainordú iad.

IARSCRÍBHINN V

NÓSANNA IMEACHTA UM MEASÚNÚ COMHRÉIREACHTA D'FHOCHÓRAIS AGUS DO CHOMHPHÁIRTEANNA SÁBHÁILTEACHTA: MODÚL D: CINEÁL-CHOMHRÉIREACHT ARNA BUNÚ AR DHEARBHÚ CÁILÍOCHTA PHRÓISEAS AN TÁIRGTHE

1. Is ionann cineál-chomhréireacht arna bunú ar dhearbhú cáilíochta phróiseas an táirgthe agus an chuid sin de nós imeachta um measúnú comhréireachta ina gcomhlíonann an monaróir na hoibleagáidí atá leagtha síos i bpointe 2.2 agus i bpointe 2.5, agus ina n-áiríthíonn agus ina ndearbhaíonn sé faoin fhreagracht aonair atá air go bhfuil na fochórais nó na comhpháirteanna sábháilteachta lena mbaineann i gcomhréir leis an gcineál a bhfuil tuairisc air sa deimhniú imar scrúdú cineáil an AE agus go gcomhlíonann sé ceanglais an Rialacháin seo a bhaineann leo.

2. Monarú

Feidhmeoidh an monaróir córas cáilíochta ceadaithe le haghaidh cúrsaí táirgthe, le himscrúdú a dhéanamh ar an táirge deiridh agus le haghaidh tástáil na bhfochórais nó na gcomhpháirteanna sábháilteachta lena mbaineann mar atá sonraithe i bpointe 2.3, agus beidh sé faoi réir faireachais mar atá sonraithe i bpointe 2.4.

3. Córas cáilíochta

3.1. Cuirfidh an monaróir isteach iarratas ar mheasúnú ar a chóras cáilíochta chuig a rogha comhlacht dá dtugtar fógra.

Beidh na nithe seo a leanas san iarratas:

- (a) ainm agus seoladh an mhonaróra agus, más é an t-ionadaí údaráithe a chuireann an t-iarratas isteach, a ainm agus a sheoladh freisin;
- (b) dearbhú i scríbhinn nár cuireadh an t-iarratas céanna isteach chuig aon comhlacht eile dá dtugtar fógra;
- (c) an fhaisnéis iomchuí go léir maidir leis na fochórais nó na comhpháirteanna sábháilteachta a formheasadh faoi mhodúl B;
- (d) na doiciméid a bhaineann leis an gcóras cáilíochta;

- (e) an doiciméadacht theicniúil maidir leis an gcineál formheasta agus cóip den deimhniú (deimhnithe) ar scrúdú cineáil an AE;
- (f) sonraí maidir leis an áitreabh ina ndéantar an fochóras nó an chomhpháirt sábháilteachta a mhonarú.

3.2. Áiríteofar sa chóras cáilíochta go bhfuil na fochórais nó na comhpháirteanna sábháilteachta i gcomhréir leis an gcineál (na cineálacha) a bhfuil tuairisc air/orthu sa deimhniú (sna deimhnithe) ar scrúdú cineáil an AE agus go gcomhlíonann siad ceanglais an Rialacháin seo a bhaineann leo.

Déanfar na heilimintí, na ceanglais agus forálacha uile arna nglacadh ag an monaróir a dhoiciméadú ar bhealach córasach, ordúil i bhfoirm beartais, nósanna imeachta agus teoracha scríofa. Ceadóidh doiciméadacht an chórais cháilíochta léirmhíniú comhsheasmhach ar na cláir, pleananna, lámhleabhair agus taifid cháilíochta.

Beidh ann, go háirithe, cur síos leordhóthanach orthu seo a leanas:

- (a) na cuspóirí cáilíochta agus an struchtúr eagrúcháin, freagrachtaí agus cumhachtaí na bainistíochta maidir le cáilíocht an táirge,
- (b) na teicnící comhfhreagracha monaraithe, um rialú cáilíochta agus dearbhú cáilíochta, na próisis agus na gníomhaíochtaí córasacha a úsáidfear,
- (c) na scrúduithe agus na tástálacha a chuirfear i gcrích roimh mhonarú, lena linn agus dá éis, agus a mhinice a chuirfear i gcrích iad,
- (d) na taifid cháilíochta, amhail tuarascálacha cigireachta agus sonraí tástála, sonraí calabrúcháin, tuarascálacha cáilíochta ar an bpearsanra i dtrácht, etc.,
- (e) an tslí chun faireachán a dhéanamh ar cháilíocht riachtanach an táirge agus ar oibriú éifeachtúil an chórais cháilíochta.

3.3. Déanfaidh an comhlacht dá dtugtar fógra an córas cáilíochta a mheasúnú chun cinneadh a dhéanamh cibé an gcomhlíonann sé na ceanglais dá dtagraítear i bpointe 3.2.

Toimheofar comhréireacht leis na ceanglais sin maidir le gnéithe an chórais cháilíochta a chomhlíonann sonraíochtaí comhfhreagracha an chaighdeáin náisiúnta lena gcuirtear an caighdeán comhchuibhithe ábhartha agus/nó na sonraíochtaí teicniúla i bhfeidhm.

Áireofar san iniúchadh cuairt measúnaithe chuig an áitreabh ina ndéantar na fochórais nó na comhpháirteanna sábháilteachta a mhonarú, a imscrúdú agus a thástáil.

Chomh maith le cleachtadh ar chórais bhainistíochta cáilíochta, beidh ar an bhfoireann iniúchta ball amháin ar a laghad ag a bhfuil taithí ar mheastóireacht sa réimse suiteálacha cábla-bhealaigh agus i dteicneolaíocht na bhfochóras nó na gcomhpháirteanna sábháilteachta atá i gceist, agus eolas ar cheanglais infheidhme an Rialacháin seo. Beidh cuairt measúnaithe chuig áitreabh an mhonaróra san áireamh san iniúchadh. Athbhreithneoidh an fhoireann iniúcháireachta an doiciméadacht theicniúil dá dtagraítear i bpointe 3.1(e), chun fíorú a dhéanamh ar chumas an mhonaróra chun ceanglais ábhartha an Rialacháin seo a shainaitheint, agus na scrúduithe is gá a chur i gcrích d'fhonn a áirithiú go gcomhlíonfaidh na fochórais nó na comhpháirteanna sábháilteachta na ceanglais sin.

Tabharfar fógra don mhonaróir maidir leis an gcinneadh. Beidh san fhógra conclúidí an iniúchta agus an cinneadh measúnaithe réasúnaithe.

3.4. Geallfaidh an monaróir go gcomhlíonfaidh sé na hoibleagáidí a eascraíonn as an gcóras cáilíochta mar atá formheasta agus é a chothabháil ionas go mbeidh sé leormhaith agus éifeachtúil i gcónaí.

3.5. Coinneoidh an monaróir an comhlacht dá dtugtar fógra agus a bhfuil an córas cáilíochta formheasta aige ar an eolas maidir le haon athrú beartaithe ar an gcóras cáilíochta.

Déanfaidh an comhlacht dá dtugtar fógra meastóireacht ar aon athruithe beartaithe agus cinnfidh sé cibé an leanfaidh an córas cáilíochta modhnaithe de na ceanglais dá dtagraítear i bpointe 3.2 a chomhlíonadh nó cibé an bhfuil gá le hathmheasúnú a dhéanamh.

Cuirfidh sé an monaróir ar an eolas faoi thoradh na meastóireachta. I gcás ina gcaithfear athmheasúnacht a dhéanamh, cuirfidh sé an monaróir ar an eolas faoina chinneadh. Beidh san fhógra conclúidí an imscrúdaithe agus an cinneadh measúnaithe réasúnaithe.

4. Faireachas faoi chúram an chomhlachta dá dtugtar fógra

4.1. Is é is aidhm d'fhaireachas a áirithiú go gcomhlíonann an monaróir na hoibleagáidí a eascraíonn ón gcóras formheasta um táirgeadh cáilíochta.

4.2. Tabharfaidh an monaróir, chun críocha measúnachta, cead don chomhlacht dá dtugtar fógra, rochtain a fháil ar na láithreáin monaraithe, iniúchta, tástála agus stórála agus tabharfaidh sé an fhaisnéis go léir is gá dó, go háirithe:

- (a) na doiciméid a bhaineann leis an gcóras cáilíochta;
- (b) na taifid cháilíochta, amhail tuarascálacha cigireachta agus sonraí tástála, sonraí calabrúcháin, tuarascálacha cáilíochta ar an bpearsanra atá i gceist, etc.

4.3. Déanfaidh an comhlacht dá dtugtar fógra iniúchtaí tréimhsiúla uair amháin gach dhá bhliain ar a laghad lena áirithiú go ndéanann an monaróir cothabháil ar an gcóras cáilíochta agus go gcuireann sé i bhfeidhm é agus tabharfaidh sé tuarascáil iniúchta don mhonaróir.

4.4. Ina theannta sin, féadfaidh an comhlacht dá dtugtar fógra cuairteanna gan choinne a thabhairt ar an monaróir. Le linn cuairteanna den sórt sin féadfaidh an comhlacht dá dtugtar fógra, más gá, tástálacha a dhéanamh ar an táirge, nó socrú lena ndéanamh, d'fhonn a dheimhniú go bhfuil an córas cáilíochta ag feidhmiú mar is ceart. Cuirfidh an comhlacht dá dtugtar fógra tuarascáil ar fáil don mhonaróir maidir lena chuairt agus, má rinneadh tástálacha, gheobhaidh sé tuairisc maidir leis an tástáil.

5. Comhartha CE agus dearbhú comhréireachta AE

5.1. Greamóidh an monaróir an comhartha CE agus, faoi chúram an chomhlachta dá dtugtar fógra dá dtagraítear i bpointe 3.1, uimhir aitheantais an chomhlachta sin de gach fochóras nó comhpháirt sábháilteachta aonair atá i gcomhréir leis an gcineál a thuairiscítear sa deimhniú ar scrúdú cineáil an AE agus a chomhlíonann ceanglais infheidhme an Rialacháin. Má aontaíonn an comhlacht dá dtugtar fógra agus faoina chúram siúd, féadfaidh an monaróir uimhir aitheantais an chomhlachta dá dtugtar fógra a ghreamú de na fochórais nó de na comhpháirteanna sábháilteachta le linn an phróisis monaraíochta.

5.2. Déanfaidh an monaróir dearbhú comhréireachta AE maidir le gach fochóras nó comhpháirt sábháilteachta a tharraingt suas agus beidh cóip ar fáil do na húdaráis náisiúnta ar feadh 30 bliain tar éis an fochóras nó an chomhpháirt sábháilteachta a chur ar an margadh. Aithneoidh an dearbhú comhréireachta AE an fochóras nó an chomhpháirt sábháilteachta dar tarraingíodh suas é.

Déanfar cóip den dearbhú comhréireachta AE a chur ar fáil do na húdaráis ábhartha arna iarraidh sin.

6. Coinneoidh an monaróir, ar feadh tréimhse 30 bliain tar éis an fochóras nó an chomhpháirt sábháilteachta deiridh a chur ar an margadh, iad seo a leanas ar fáil do na húdaráis náisiúnta:

- (a) na doiciméid dá dtagraítear i bpointe 3.1;

- (b) an t-athrú dá dtagraítear i bpointe 3.5, arna fhormheas;
- (c) cinntí agus tuarascálacha an chomhlachta dá dtugtar fógra dá dtagraítear i bpointí 3.5, 4.3 agus 4.4.

7. Cuirfidh gach comhlacht dá dtugtar fógra a údaráis a thugann fógra ar an eolas maidir le córais cháilíochta a dtarraingítear siar a gcuid gceadanna, agus cuirfidh sé ar fáil, go tréimhsiúil nó arna iarraidh air, dá údaráis a thugann fógra faisnéis a bhaineann le measúnachtaí ar chórais cháilíochta.

Cuirfidh gach comhlacht dá dtugtar fógra na comhlachtaí eile dá dtugtar fógra ar an eolas maidir le ceadanna córas cáilíochta a diúltaíodh, a cuireadh ar fionraí, a tarraingíodh siar nó ar cuireadh srian orthu ar aon bhealach eile, ag tabhairt na gcúiseanna lena chinneadh.

8. Ionadaí údaraithe

Féadfaidh a ionadaí údaraithe oibleagáidí an mhonaróra atá leagtha amach i bpointí 3.1, 3.5, 5 agus 6 a chomhlíonadh, thar a cheann agus faoina fhreagracht, ar choinníoll go sonraítear sa sainordú iad.

IARSCRÍBHINN VI

NÓSANNA IMEACHTA UM MEASÚNÚ COMHRÉIREACHTA D'FHOCHÓRAIS AGUS DO CHOMHPHÁIRTEANNA SÁBHÁILTEACHTA: MODÚL F: CINEÁL-CHOMHRÉIREACHT ARNA BUNÚ AR FHÍORÚ FOCHÓRAS NÓ COMHPHÁIRTEANNA SÁBHÁILTEACHTA

1. Is ionann cineál-chomhréireacht arna bunú ar fhíorú fochóras nó comhpháirteanna sábháilteachta agus an chuid sin de nós imeachta um measúnú comhréireachta ina gcomhlíonann an monaróir na hoibleagáidí atá leagtha síos i bpointí 3.2, 3.5.1 agus 3.6, agus ina n-áiríthíonn agus ina ndearbhaíonn sé faoin fhreagracht aonair atá air go bhfuil na fochórais nó na comhpháirteanna sábháilteachta lena mbaineann, a bhí faoi réir fhorálacha phointe 3.3, i gcomhréir leis an gcineál a bhfuil tuairisc air sa deimhniú ar scrúdú cineáil an AE agus go gcomhlíonann siad ceanglais an Rialacháin seo.

2. Monarú

Déanfaidh an monaróir gach beart is gá ionas go n-áiritheoidh an próiseas monaraíochta agus faireachán an phróisis comhréireacht na bhfochóras monaraithe nó na gcomhpháirteanna sábháilteachta leis an gcineál formheasta a thuairiscítear sa deimhniú ar scrúdú cineáil an AE agus le ceanglais an Rialacháin seo.

3. Fíorú

3.1. Cuirfidh an monaróir isteach iarratas ar fhíorú fochóras nó comhpháirteanna sábháilteachta chuig a rogha comhlachta dá dtugtar fógra.

Beidh na nithe seo a leanas san iarratas:

- (a) ainm agus seoladh an mhonaróra agus, más é an t-ionadaí údaraithe a chuireann an t-iarratas isteach, a ainm agus a sheoladh freisin;
- (b) dearbhú i scríbhinn nár cuireadh an t-iarratas céanna isteach chuig aon chomhlacht eile dá dtugtar fógra;
- (c) an fhaisnéis iomchuí go léir maidir leis na fochórais nó na comhpháirteanna sábháilteachta a formheasadh faoi mhodúl B;
- (d) an doiciméadacht theicniúil maidir leis an gcineál formheasta agus cóip den deimhniú (deimhnithe) ar scrúdú cineáil AE;

- (e) sonraí an áitribh inar féidir (ina monaraítear) an fochóras nó an chomhpháirt sábháilteachta a scrúdú.

3.2 Déanfaidh an comhlacht dá dtugtar fógra scrúduithe agus tástálacha iomchuí, nó socróidh sé lena ndéanamh, d'fhonn comhréireacht na bhfochóras nó na gcomhpháirteanna sábháilteachta leis an gcineál formheasta a thuairiscítear sa deimhniú ar scrúdú cineáil an AE agus le ceanglais iomchuí an Rialacháin seo a sheiceáil.

Déanfar na himscrúduithe agus na tástálacha chun comhréireacht na bhfochóras nó na gcomhpháirteanna sábháilteachta leis na ceanglais iomchuí a sheiceáil, faoi rogha an mhonaróra, trí scrúdú agus tástáil a dhéanamh ar gach fochóras nó comhpháirt sábháilteachta mar atá sonraithe i bpointe 4 nó trí scrúdú agus tástáil a dhéanamh ar na fochórais nó na comhpháirteanna sábháilteachta ar bhonn staitistiúil mar atá sonraithe i bpointe 5.

4. Fíorú comhréireachta trí scrúdú agus tástáil a dhéanamh ar gach fochóras nó comhpháirt sábháilteachta

4.1. Déanfar scrúdú aonair ar gach fochóras nó comhpháirt sábháilteachta agus déanfar tástálacha iomchuí mar atá leagtha amach sa chaighdeán (sna caighdeáin) comhchuibhithe ábhartha, nó tástálacha coibhéiseacha, d'fhonn comhréireacht a fhíorú leis an gcineál formheasta a thuairiscítear sa deimhniú ar scrúdú cineáil an AE agus le ceanglais iomchuí an Rialacháin seo.

In éagmais caighdeán comhchuibhithe den sórt sin, cinnfidh an comhlacht sin dá dtugtar fógra cé na tástálacha iomchuí a dhéanfar.

4.2. Eiseoidh an comhlacht dá dtugtar fógra deimhniú comhréireachta maidir leis na scrúduithe agus na tástálacha arna ndéanamh, agus greamóidh sé a uimhir aitheantais de gach fochóras nó comhpháirt sábháilteachta fhormheasta nó socróidh sé go ngreamófar í faoina chúram.

Coinneoidh an monaróir na deimhnithe comhréireachta ionas go mbeidh siad ar fáil ag na húdaráis náisiúntalena n-imscrúdú ar feadh 30 bliain tar éis an fochóras nó an chomhpháirt sábháilteachta a chur ar an margadh.

5. Fíorú staitistiúil comhréireachta

5.1. Déanfaidh an monaróir gach beart is gá ionas go n-áiritheofar sa phróiseas monaraíochta agus i bhfaireachán an phróisis aonchineálacht gach baisce a tháirgtear, agus go gcuirfidh sé a fhochóras nó a chomhpháirt sábháilteachta i láthair i gcomhair fíoraithe i bhfoirm baisceanna aonchineálacha.

5.2. Tógfar sampla randamach ó gach baisc de réir cheanglais an Rialacháin seo. Déanfar scrúdú aonair ar na fochórais nó ar na comhpháirteanna sábháilteachta go léir sa sampla agus déanfar tástálacha iomchuí orthu mar atá leagtha amach sa chaighdeán (sna caighdeáin) comhchuibhithe ábhartha nó sonraíochtaí teicniúla, nó tástálacha coibhéiseacha, d'fhonn a gcomhréireacht a áirithiú leis an gcineál formheasta a thuairiscítear sa deimhniú ar scrúdú cineáil an AE agus le ceanglais iomchuí an Rialacháin seo d'fhonn a chinneadh lena chinneadh an nglactar leis an mbaisc nó an ndiúltófar di. In éagmais caighdeán comhchuibhithe den sórt sin, glacfaidh an comhlacht sin dá dtugtar fógra cinneadh maidir leis na tástálacha iomchuí a dhéanfar.

5.3. I gcás ina nglactar le baisc, measfar na fochórais nó na comhpháirteanna sábháilteachta go léir sa bhaisc a bheith formheasta, ach amháin na fochórais nó na comhpháirteanna sábháilteachta sin ón sampla nár chomhlíon na tástálacha.

Eiseoidh an comhlacht dá dtugtar fógra deimhniú comhréireachta maidir leis na scrúduithe agus na tástálacha arna ndéanamh, agus greamóidh sé a uimhir aitheantais de gach fochóras nó comhpháirt sábháilteachta fhormheasta nó socróidh sé go ngreamófar í faoina chúram.

Coinneoidh an monaróir na deimhnithe comhréireachta ar fáil do na húdaráis náisiúnta ar feadh 30 bliain tar éis an fochóras nó an chomhpháirt sábháilteachta a chur ar an margadh.

5.4. Má dhiúltaítear do bhaisc, glacfaidh an comhlacht dá dtugtar fógra nó an t-údarás inniúil bearta iomchuí ionas nach gcuirfear an bhaisc sin ar an margadh. I gcás ina ndiúltaítear do bhaisceanna go minic, féadfaidh an comhlacht dá dtugtar fógra an fíorú staitistiúil a chur ar fionraí agus bearta iomchuí a ghlacadh.

6. Comhartha CE agus dearbhú comhréireachta AE

6.1. Greamóidh an monaróir an comhartha CE agus, faoi chúram an chomhlachta dá dtugtar fógra dá dtagraítear i bpointe 3, uimhir aitheantais an chomhlachta sin de gach fochóras nó comhpháirt sábháilteachta aonair atá i gcomhréir leis an gcineál formheasta a thuairiscítear sa deimhniú ar scrúdú cineáil an AE agus a chomhlíonann ceanglais infheidhme an Rialacháin seo.

6.2. Déanfaidh an monaróir dearbhú comhréireachta AE maidir le gach fochóras nó comhpháirt sábháilteachta a tharraingt suas agus beidh sé ar fáil do na húdaráis náisiúnta, ar feadh 30 bliain tar éis an fochóras nó an chomhpháirt sábháilteachta a chur ar an margadh. Aithneoidh an dearbhú comhréireachta AE an fochóras nó an chomhpháirt sábháilteachta dar tarraingíodh suas é.

Déanfar cóip den dearbhú comhréireachta AE a chur ar fáil do na húdaráis ábhartha arna iarraidh sin.

Déanfar cóip den dearbhú comhréireachta AE a chur ar fáil arna iarraidh sin.

Má aontaíonn an comhlacht dá dtugtar fógra dá dtagraítear i bpointe 3 agus faoina chúram siúd, féadfaidh an monaróir uimhir aitheantais an chomhlachta dá dtugtar fógra a ghreamú de na fochórais nó de na comhpháirteanna sábháilteachta.

7. Má aontaíonn an comhlacht dá dtugtar fógra agus faoina chúram siúd, féadfaidh an monaróir uimhir aitheantais an chomhlachta dá dtugtar fógra a ghreamú de na fochórais nó de na comhpháirteanna sábháilteachta le linn an phróisis monaraithe.

8. Ionadaí údaráithe

Féadfaidh a ionadaí údaráithe oibleagáidí an mhonaróra atá leagtha amach i bpointe 2 agus i bpointe 5.1 a chomhlíonadh, thar a cheann agus faoina fhreagracht, ar choinníoll go sonraítear iad sa sainordú.

IARSCRÍBHINN VII

NÓSANNA IMEACHTA UM MEASÚNÚ COMHRÉIREACHTA D'FHOCHÓRAIS AGUS DO CHOMHPHÁIRTEANNA SÁBHÁILTEACHTA: MODÚL G: COMHRÉIREACHT ARNA BUNÚ AR FHÍORÚ AONAIÐ

1. Is ionann comhréireacht arna bunú ar fhíorú aonaid agus an nós imeachta um measúnú comhréireachta ina gcomhlíonann an monaróir na hoibleagáidí atá leagtha síos i bpointí 4.2, 4.3 agus 4.5, agus ina n-áiríthíonn agus ina ndearbhaíonn sé faoin fhreagracht aonair atá air go bhfuil an fochóras nó an chomhpháirt sábháilteachta lena mbaineann, a bhí faoi réir fhorálacha phointe 4.4, i gcomhréir le ceanglais an Rialacháin seo.

2. Monarú

Déanfaidh an monaróir gach beart is gá ionas go n-áiritheoidh an próiseas monaraíochta agus faireachán an phróisis comhréireacht an fhochórais nó na comhpháirte sábháilteachta monaraithe le ceanglais an Rialacháin seo.

3. Fíorú

3.1. Cuirfidh an monaróir isteach iarratas ar fhíorú aonaid fochórais nó comhpháirte sábháilteachta chuig a rogha comhlachta dá dtugtar fógra.

Beidh na nithe seo a leanas san iarratas:

- (a) ainm agus seoladh an mhonaróra agus, más é an t-ionadaí údaraithe a chuireann an t-iarratas isteach, a ainm agus a sheoladh freisin;
- (b) dearbhú i scríbhinn nár cuireadh an t-iarratas céanna isteach chuig aon chomhlacht eile dá dtugtar fógra;
- (c) an doiciméadacht theicniúil don fhochóras agus/nó don chomhpháirt sábháilteachta i gcomhréir le hIarscríbhinn IX;
- (d) sonraí an áitribh inar féidir (ina monaraítear) an fochóras nó an chomhpháirt sábháilteachta a scrúdú.

3.2 Déanfaidh an comhlacht dá dtugtar fógra scrúdú ar an doiciméadacht theicniúil don fhochóras nó don chomhpháirt sábháilteachta agus déanfaidh sé na scrúduithe agus tástálacha iomchuí, mar atá leagtha amach sna caighdeáin chomhchuibhithe agus sna sonraíochtaí teicniúla, nó tástálacha coibhéiseacha, lena áirithiú go mbeidh siad i gcomhréir le ceanglais infheidhme an Rialacháin seo, nó socróidh sé go ndéanfar iad. In éagmais caighdeán chomhchuibhithe agus sonraíocht theicniúil den sórt sin, glacfaidh an comhlacht sin dá dtugtar fógra cinneadh maidir leis na tástálacha iomchuí a dhéanfar.

Eiseoidh an comhlacht dá dtugtar fógra deimhniú comhréireachta maidir leis na scrúduithe agus na tástálacha arna ndéanamh agus greamóidh sé a uimhir aitheantais den fhochóras nó den chomhpháirt sábháilteachta fhormheasta, nó socróidh sé go ngreamófar í faoina chúram.

Má dhiúltaíonn an comhlacht dá dtugtar fógra deimhniú comhréireachta a eisiúint, luafaidh sé go mionchruinn na cúiseanna leis an diúltú agus cuirfidh sé in iúl na bearta ceartaitheacha is gá a ghlacadh.

Nuair a dhéanann an monaróir iarratas in athuair ar fhíorú aonaid an fhochórais nó na comhpháirte sábháilteachta lena mbaineann, déanfaidh sé iarratas chuig an gcomhlacht céanna dá dtugtar fógra.

Arna iarraidh sin, tabharfaidh an comhlacht dá dtugtar fógra cóip den deimhniú comhréireachta don Choimisiún agus do na Ballstáit.

Coinneoidh an monaróir an doiciméadacht theicniúil agus cóip den deimhniú comhréireachta agus beidh siad ar fáil do na húdaráis náisiúnta ar feadh 30 bliain tar éis an fochórais nó an chomhpháirt sábháilteachta a chur ar an margadh.

4. Comhartha CE agus dearbhú comhréireachta AE

4.1. Greamóidh an monaróir an comhartha CE agus, faoi chúram an chomhlachta dá dtugtar fógra dá dtagraítear i bpointe 4, uimhir aitheantais an chomhlachta sin de gach fochóras nó comhpháirt sábháilteachta aonair a chomhlíonann ceanglais infheidhme an Rialacháin seo.

4.2. Déanfaidh an monaróir dearbhú comhréireachta AE a tharraingt suas agus beidh sé ar fáil do na húdaráis náisiúnta, ar feadh 30 bliain tar éis an fochórais nó an chomhpháirt sábháilteachta a chur ar an margadh. Aithneoidh an dearbhú comhréireachta AE an fochóras nó an chomhpháirt sábháilteachta dar tarraingíodh suas é.

Déanfar cóip den dearbhú comhréireachta AE a chur ar fáil do na húdaráis ábhartha arna iarraidh sin.

5. Ionadaí údaraithe

Féadfaidh a ionadaí údaraithe oibleagáidí an mhonaróra atá leagtha amach i bpointe 3.1 agus i bpointe 4 a chomhlíonadh, thar a cheann agus faoina fhreagracht, ar choinníoll go sonraítear sa sainordú iad.

IARSCRÍBHINN VIII

NÓSANNA IMEACHTA UM MEASÚNÚ COMHRÉIREACHTA D'FHOCHÓRAIS AGUS DO CHOMHPHÁIRTEANNA SÁBHÁILTEACHTA: MODÚL H: COMHRÉIREACHT ARNA BUNÚ AR DHEARBHÚ CÁILÍOCHTA IOMLÁN

1. Is ionann comhréireacht arna bunú ar dhearbhú cáilíochta iomlán agus an nós imeachta um measúnú comhréireachta ina gcomhlíonann an monaróir na hoibleagáidí atá leagtha síos i bpointe 2 agus i bpointe 5, agus ina n-áirithíonn agus ina ndearbhaíonn sé faoin fhreagracht aonair atá air go gcomhlíonann na fochórais nó na comhpháirteanna sábháilteachta lena mbaineann ceanglais an Rialacháin seo.

2. Monarú

Feidhmeoidh an monaróir córas cáilíochta formheasta maidir le dearadh, monarú agus scrúdú agus tástáil deiridh na bhfochórais nó na gcomhpháirteanna sábháilteachta atá sonraithe i bpointe 3 agus beidh sé faoi réir faireachais mar atá sonraithe i bpointe 4.

3. Córas cáilíochta

3.1. Cuirfidh an monaróir isteach iarratas ar mheasúnú ar a chóras cáilíochta chuig a rogha comhlachta dá dtugtar fógra, maidir leis na fochórais nó na comhpháirteanna sábháilteachta lena mbaineann.

Beidh na nithe seo a leanas san iarratas:

- (a) ainm agus seoladh an mhonaróra agus, más é an t-ionadaí údaraithe a chuireann an t-iarratas isteach, a ainm agus a sheoladh freisin;
- (b) gach faisnéis is gá maidir leis na fochórais nó na comhpháirteanna sábháilteachta atá le monarú;
- (c) an doiciméadacht theicniúil gcomhréir le hIarscríbhinn IX maidir le cineál ionadaíoch amháin de gach catagóir fochórais nó comhpháirte sábháilteachta atá le monarú.
- (d) na doiciméid a bhaineann leis an gcóras cáilíochta;
- (e) sonraí an áitribh ina ndéantar na fochórais nó na comhpháirteanna sábháilteachta a dhearadh, a mhonarú, a scrúdú agus a thástáil;
- (f) dearbhú i scríbhinn nár cuireadh an t-iarratas céanna isteach chuig aon chomhlacht eile dá dtugtar fógra.

3.2. Áiritheoidh an córas cáilíochta go bhfuil an fochóras nó an chomhpháirt sábháilteachta ag comhlíonadh ceanglais an Rialacháin seo a bhaineann leis.

Déanfar na heilimintí, na ceanglais agus forálacha uile arna nglacadh ag an monaróir a dhoiciméadú ar bhealach córasach, ordúil i bhfoirm beartais, nósanna imeachta agus treoracha scríofa. Ceadóidh doiciméadú an chórais cháilíochta léirmhíniú comhsheasmhach ar na cláir, pleananna, lámhleabhair agus taifid cháilíochta.

Beidh ann, go háirithe, cur síos leordhóthanach orthu seo a leanas:

- (a) na cuspóirí cáilíochta agus an struchtúr eagrúcháin, freagrachtaí agus cumhachtaí na bainistíochta maidir le dearadh agus cáilíocht na bhfochóras agus na gcomhpháirteanna sábháilteachta;
- (b) na sonraíochtaí maidir leis an dearadh teicniúil, lena n-áirítear na caighdeáin, a chuirfear i bhfeidhm agus, i gcás nach gcuirfear na caighdeáin chomhchuibhithe ábhartha i bhfeidhm go hiomlán, an modh a úsáidfear lena áirithiú go gcomhlíonfar ceanglais riachtanacha an Rialacháin seo;
- (c) na teicnící, na próisis agus gníomhaíochtaí córasacha um rialú deartha agus um fhíorú deartha, a úsáidfear nuair a bheidh na fochórais nó na comhpháirteanna sábháilteachta á ndearadh.
- (d) na teicnící, na próisis agus na gníomhaíochtaí córasacha comhfhreagracha monaraíochta, um rialú cáilíochta agus um dhearbhu cáilíochta, a úsáidfear;
- (e) na scrúduithe agus na tástálacha a chuirfear i gcrích roimh mhonarú, lena linn agus dá éis, agus a mhinice a chuirfear i gcrích iad;
- (f) na taifid cháilíochta, amhail tuairiscí cigireachta agus sonraí tástála, sonraí calabrúcháin, tuairiscí cáilíochta maidir leis an bpearsanra atá i gceist, etc.;
- (g) an tslí ina ndéanfar faireachán ar cháilíocht riachtanach an deartha agus an táirge agus ar oibriú éifeachtúil an chórais cháilíochta.

3.3. Déanfaidh an comhlacht dá dtugtar fógra an córas cáilíochta a mheasúnú chun cinneadh a dhéanamh an gcomhlíonann sé na ceanglais dá dtagraítear i bpointe 3.2 nó nach gcomhlíonann. Toimhdeofar comhréireacht leis na ceanglais sin maidir le gnéithe an chórais cháilíochta a chomhlíonann sonraíochtaí comhfhreagracha an chaighdeáin náisiúnta lena gcuirtear an caighdeán comhchuibhithe ábhartha agus/nó an tsonraíocht theicniúil i bhfeidhm.

Áireofar san iniúchadh cuairt measúnaithe chuig an áitreabh ina ndéantar na fochórais nó na comhpháirteanna sábháilteachta a dhearadh, a mhonarú, a scrúdú agus a thástáil.

Chomh maith le cleachtadh ar chórais bhainistíochta cáilíochta, beidh ar an bhfoireann iniúchta ball amháin ar a laghad ag a bhfuil taithí mar mheasúnóir sa réimse suiteálacha cábla-bhealaigh agus i dteicneolaíocht na bhfochóras nó na gcomhpháirteanna sábháilteachta atá i gceist, agus eolas ar cheanglais infheidhme an Rialacháin seo.

Athbhreithneoidh an fhoireann iniúcháireachta an doiciméadacht theicniúil dá dtagraítear i bpointe 3.1 chun fíorú a dhéanamh ar chumas an mhonaróra ceanglais infheidhme an Rialacháin seo a shainaithint agus na scrúduithe is gá a chur i gcrích d'fhonn a áirithiú go gcomhlíonfaidh na fochórais nó na comhpháirteanna sábháilteachta na ceanglais sin.

Cuirfidh an comhlacht dá dtugtar fógra an monaróir nó a ionadaí údaráithe ar an eolas maidir lena chinneadh. Beidh san fhógra conclúidí an iniúchta agus an cinneadh measúnaithe réasúnaithe.

3.4. Geallfaidh an monaróir go gcomhlíonfaidh sé na hoibleagáidí a eascraíonn as an gcóras cáilíochta mar atá formheasta agus é a chothabháil ionas go mbeidh sé leormhaith agus éifeachtúil i gcónaí.

3.5 Coinneoidh an monaróir an comhlacht dá dtugtar fógra agus a bhfuil an córas cáilíochta formheasta aige ar an eolas maidir le haon athrú beartaithe ar an gcóras cáilíochta.

Déanfaidh an comhlacht dá dtugtar fógra meastóireacht ar aon athruithe beartaithe agus cinnfidh sé an leanfaidh an córas cáilíochta modhnaithe de na ceanglais dá dtagraítear i bpointe 3.2 a chomhlíonadh nó an bhfuil gá le hathmheasúnú a dhéanamh.

Cuirfidh sé an monaróir ar an eolas faoi thoradh na meastóireachta. I gcás ina gcaithfear athmheasúnú a dhéanamh, cuirfidh sé an monaróir ar an eolas faoina chinneadh. Beidh san fhógra conclúidí an mheasúnaithe agus an cinneadh measúnaithe réasúnaithe.

4. Faireachas faoi chúram an chomhlachta dá dtugtar fógra

4.1. Is é is aidhm d'fhairéachas a áirithiú go gcomhlíonann an monaróir na hoibleagáidí a eascraíonn ón gcóras cáilíochta formheasta.

4.2. Tabharfaidh an monaróir, chun críocha measúnaithe, cead don chomhlacht dá dtugtar fógra, rochtain a fháil ar na láithreáin dearaidh, monaraithe, iniúchta, tástála agus stórála agus tabharfaidh sé an fhaisnéis go léir is gá dó, go háirithe:

- (a) an doiciméadacht a bhaineann leis an gcóras cáilíochta;
- (b) na taifid cháilíochta dá bhforáiltear i gcuid an deartha den chóras cáilíochta, amhail torthaí na n-anailísí, ríomhanna, tástálacha, etc.;
- (c) na taifid cháilíochta dá bhforáiltear i gcuid an mhonaraithe den chóras cáilíochta, amhail tuairiscí cigireachta agus sonraí tástála, sonraí calabrúcháin, tuairiscí cáilíochta maidir leis an bpearsanra lena mbaineann, etc.

4.3. Déanfaidh an comhlacht dá dtugtar fógra iniúchtaí tréimhsiúla lena áirithiú go ndéanann an monaróir cothabháil ar an gcóras cáilíochta agus go gcuireann sé i bhfeidhm é agus tabharfaidh sé tuairisc iniúchta don mhonaróir. Beidh minicíocht na n-iniúchtaí tréimhsiúla leagtha amach ar bhealach a chiallóidh go ndéanfar athmheasúnú iomlán gach trí bliana.

4.4. Ina theannta sin, féadfaidh an comhlacht dá dtugtar fógra cuairteanna gan choinne a thabhairt ar an monaróir.

Le linn cuairteanna den sórt sin, féadfaidh an comhlacht dá dtugtar fógra, más gá, tástálacha a dhéanamh ar an táirge, nó socrú lena ndéanamh, d'fhonn feidhmiú ceart an chórais cháilíochta a sheiceáil. Tabharfaidh sé tuairisc don mhonaróir maidir lena chuairt agus, má rinneadh tástálacha, gheobhaidh sé tuairisc maidir leis an tástáil.

5. Comhartha CE agus dearbhú comhréireachta AE

5.1 Greamóidh an monaróir an comhartha CE agus, faoi chúram an chomhlachta dá dtugtar fógra dá dtagraítear i bpointe 3.1, uimhir aitheantais an chomhlachta sin de gach fochóras nó comhpháirt sábháilteachta aonair atá i gcomhréir leis an gcineál a thuairiscítear sa deimhniú ar scrúdú cineáil an AE agus a chomhlíonann ceanglais infheidhme an Rialacháin seo.

Má aontaíonn an comhlacht dá dtugtar fógra agus faoina chúram siúd, féadfaidh an monaróir uimhir aitheantais an chomhlachta dá dtugtar fógra a ghreamú de na fochórais nó de na comhpháirteanna sábháilteachta le linn an phróisis monaraithe.

5.2 Déanfaidh an monaróir dearbhú comhréireachta AE maidir le gach fochóras nó comhpháirt sábháilteachta a tharraingt suas agus beidh cóip ar fáil do na húdaráis náisiúnta ar feadh 30 bliain tar éis an fochóras nó an chomhpháirt sábháilteachta a chur ar an margadh. Aithneoidh an dearbhú comhréireachta AE an fochóras nó an chomhpháirt sábháilteachta dar tarraingíodh suas é.

Déanfar cóip den dearbhú comhréireachta AE a chur ar fáil do na húdaráis ábhartha arna iarraidh sin.

6. Déanfaidh an monaróir, ar feadh tréimhse 30 bliain tar éis an fochóras nó an chomhpháirt sábháilteachta dheiridh a chur ar an margadh, iad seo a leanas a choimeád ar fáil do na húdaráis náisiúnta:

- (a) an doiciméadacht theicniúil dá dtagraítear i bpointe 3.1(c);
- (b) an doiciméadacht a bhaineann leis an gcóras cáilíochta dá dtagraítear i bpointe 3.1;
- (c) an doiciméadacht a bhaineann leis an athrú dá dtagraítear i bpointe 3.5, arna fhormheas;
- (d) cinntí agus tuairiscí an chomhlachta dá dtugtar fógra dá dtagraítear i bpointí 3.3, 3.5, 4.3 agus 4.4.

7. Cuirfidh gach comhlacht dá dtugtar fógra a údaráis a thugann fógra ar an eolas maidir le córais cháilíochta a n-eisítear nó a dtarraingítear siar a gcuid ceadanna, agus cuirfidh sé ar fáil, go tréimhsiúil nó arna iarraidh air, dá údaráis a thugann fógra liosta de na ceadanna córas cáilíochta a diúltaíodh, a cuireadh ar fionraí nó ar cuireadh srian orthu ar aon bhealach eile.

Cuirfidh gach comhlacht dá dtugtar fógra na comhlachtaí eile dá dtugtar fógra ar an eolas maidir le ceadanna córas cáilíochta a rinne sé a dhiúltú, a chur ar fionraí, nó a tharraingt siar, agus de cheadanna a d'eisigh sé maidir le córas cáilíochta.

8. Ionadaí údaraithe

Féadfaidh a ionadaí údaraithe oibleagáidí an mhonaróra atá leagtha amach i bpointí 3.1, 3.5, 5 agus 6 a chomhlíonadh, thar a cheann agus faoina fhreagracht, ar choinníoll go sonraítear sa sainordú iad.

IARSCRÍBHINN IX

DOICIMÉADACHT THEICNIÚIL D'FHOCHÓRAIS AGUS DO CHOMHPHÁIRTEANNA SÁBHÁILTEACHTA:

- (1) Fágfaidh an doiciméadacht theicniúil go bhféadfar measúnú a dhéanamh ar chomhréireacht an fhochórais nó na comhpháirte sábháilteachta le ceanglais infheidhme an Rialacháin seo agus beidh ann anailís agus measúnú leordhóthanach ar na rioscaí. Sonrófar sa doiciméadacht theicniúil na ceanglais infheidhme agus cumhdófar ann, chomh fada agus is ábhartha don mheasúnú comhréireachta, dearadh, monarú agus oibriú an fhochórais nó na comhpháirte sábháilteachta.
- (2) Beidh sa doiciméadacht theicniúil, na gnéithe seo a leanas ar a laghad:
 - (a) tuairisc ghinearálta ar an bhfochóras nó ar an gcomhpháirt sábháilteachta,
 - (b) líníochtaí agus léaráidí deartha agus monaraithe na gcomhpháirteanna, na bhfochóimeálacha, na gciordad etc. agus na tuairiscí agus na mínithe is gá chun tuiscint a fháil ar na líníochtaí agus na léaráidí sin agus ar oibriú an fhochórais nó na comhpháirte sábháilteachta;
 - (c) liosta de na caighdeáin chomhchuibhithe agus/nó na sonraíochtaí teicniúla eile ar foilsíodh a gcuid tagairtí in *Iris Oifigiúil an Aontais Eorpaigh*, atá i bhfeidhm go hiomlán nó go páirteach, agus tuairisc ar na réitigh arna nglacadh chun freastal ar cheanglais riachtanacha an Rialacháin seo i gcás nár cuireadh na caighdeáin chomhchuibhithe i bhfeidhm. I gcás caighdeáin chomhchuibhithe a bheith i bhfeidhm go páirteach, sonrófar sa doiciméadacht theicniúil na codanna a cuireadh i bhfeidhm;

- (d) an fhianaise thacaíochta maidir le leordhóthanacht an deartha, lena n-áirítear torthaí aon ríomhanna, scrúduithe nó tástálacha ar an dearadh arna ndéanamh ag an monaróir nó thar a cheann agus na tuarascálacha gaolmhara;
- (e) cóip de na treoracha don fhochóras nó don chomhpháirt sábháilteachta;
- (f) i gcás fochórais, cóip de na Dearbhuithe comhréireachta AE maidir leis na comhpháirteanna sábháilteachta atá mar chuid den fhochóras.

IARSCRÍBHINN X

DEARBHÚ COMHRÉIREACHTA AE D'FHOCHÓRAIS AGUS DO CHOMHPHÁIRTEANNA SÁBHÁILTEACHTA

- (1) Beidh an dearbhú comhréireachta AE ag gabháil leis an bhfhochóras nó leis an gcomhpháirt sábháilteachta. Tarraingeofar suas é sa teanga nó sna teangacha céanna leis an lámhleabhar dá dtagraítear i bpointe 7.1.1 d'Iarscríbhinn II.
- (2) Beidh na gnéithe seo a leanas i ndearbhú comhréireachta AE:
 - (a) Múnla an fhochórais/na comhpháirte sábháilteachta (táirge, baisc, cineál nó sraithuimhir).
 - (b) Ainm agus seoladh an mhonaróra agus, más infheidhme, ainm agus seoladh a ionadaí údairithe.
 - (c) Is faoi fhreagracht an mhonaróra amháin a eisítear an dearbhú comhréireachta seo.
 - (d) Cuspóir an dearbhaithe (aitheantas an fhochórais nó na comhpháirte sábháilteachta trína ndéantar inrianaitheacht. Féadfaidh go mbeidh, más gá d'fhonn an fochóras nó an chomhpháirt sábháilteachta a aithint, íomhá ag gabháil leis):
 - tuairisc ar an bhfhochóras nó ar an gcomhpháirt sábháilteachta (cineál, etc.);
 - an nós imeachta um measúnú comhréireachta a leanadh;
 - ainm agus seoladh an chomhlachta dá dtugtar fógra a rinne an measúnú comhréireachta;
 - tagairt don deimhniú ar scrúdú cineáil an AE mar aon le sonraí, lena n-áirítear a dháta, agus nuair is iomchuí, faisnéis maidir le fad agus coinníollacha a bhailíochta;
 - gach foráil iomchuí nach mór don chomhpháirt a chomhlíonadh agus, go háirithe, na coinníollacha úsáide.
 - (e) Tá cuspóir an dearbhaithe a bhfuil tuairisc air thuas i gcomhréir le reachtaíocht chomhchuibhithe ábhartha an Aontais: (tagairt d'Achtanna eile an Aontais a cuireadh i bhfeidhm);
 - (f) Tagairtí do na caighdeáin chomhchuibhithe ábhartha a úsáideadh nó tagairtí do na sonraíochtaí lena ndearbhaítear comhréireacht;
 - (g) Chomhlíon an comhlacht nó na comhlachtaí dá dtugtar fógra ... (ainm, seoladh, uimhir) ... (tuairisc ar an idirghabháil) ... agus d'eisigh sé an deimhniú (na deimhnithe): ...

- (h) - aitheantas an duine a bhfuil sé de chumhacht aige síniú thar ceann an mhonaróra nó a ionadaí údairithe;
- (i) Faisnéis bhreise:
 Arna shíniú le haghaidh agus thar ceann:
 (áit agus dáta eisiúna):
 (ainm, feidhm) (síniú):

IARSCRÍBHINN XI

<i>TÁBLA COMHGHAOIL</i>	
Treoir 2000/9/CE	An Rialachán seo
—	Airteagal 1
Airteagal 1(1)	Airteagal 2(1)
Airteagal 1(2)	Airteagal 3(1)
Airteagal 1(3)	Airteagal 3(7) go 3(9)
Airteagal 1(4) an chéad agus an dara fomhír	—
Airteagal 1(4) an tríú fomhír	Airteagal 8(3)
Airteagal 1(5)	Airteagal 3(1), (3) go (6)
Airteagal 2	—
Airteagal 3	Airteagal 6
—	Airteagail 3(10) go (27)
Airteagal 4	Airteagal 8
Airteagal 5(1)	Airteagal 4(1) agus (2)
Airteagal 5(2)	Airteagal 3
Airteagal 6	Airteagal 7
Airteagal 7	Airteagal —
Airteagal 8	Airteagal 4(1) agus (2)
Airteagal 9	Airteagal 4(1) agus (2)
Airteagal 10	—
Airteagal 11(1)	Airteagal 9(1)

Airteagal 11(2)	Airteagal 4(2)
Airteagal 11(3)	—
Airteagal 11(4)	—
Airteagal 11(5)	—
Airteagal 11(6)	—
Airteagal 11(7)	—
—	Airteagal 11
—	Airteagal 12
—	Airteagal 13
—	Airteagal 14
—	Airteagal 15
—	Airteagal 16
Airteagal 12	Airteagal 9(4)
Airteagal 13	Airteagal 10(1)
Airteagal 14	Airteagal —
Airteagal 15	Airteagal 10(2)
Airteagal 16	—
—	Airteagal 17
—	Airteagal 18
—	Airteagal 19
—	Airteagal 20
—	Airteagal 21
—	Airteagal 22
—	Airteagal 23
—	Airteagal 24
—	Airteagal 25
—	Airteagal 26

—	Airteagal 27
—	Airteagal 28
—	Airteagal 29
—	Airteagal 30
—	Airteagal 31
—	Airteagal 32
—	Airteagal 33
—	Airteagal 34
—	Airteagal 35
—	Airteagal 36
—	Airteagal 37
—	Airteagal 38
Airteagal 17	Airteagal 39
Airteagal 18	—
Airteagal 19	—
Airteagal 20	—
Airteagal 21	—
Airteagal 22	—
Airteagal 23	—
—	Airteagal 40
—	Airteagal 41
—	Airteagal 42
—	Airteagal 43
Iarscríbhinn I	Iarscríbhinn I
Iarscríbhinn II	Iarscríbhinn II
Iarscríbhinn III	Iarscríbhinn III
Iarscríbhinn IV	Iarscríbhinn IX

Iarscríbhinn V	Iarscríbhinní IV go VIII
Iarscríbhinn VI	Iarscríbhinn IX
Iarscríbhinn VII	Iarscríbhinní IV go VIII
Iarscríbhinn VIII	—
Iarscríbhinn IX	—
—	Iarscríbhinn X